

# DEO OPTIMO MAX. UNI ET TRINO,

VIRGINI DEI - PARÆ ET S. LUCÆ  
Orthodoxorum Medicorum Patrono.

## QUÆSTIO MEDICA,

QUOD LIBETARIIS DISPUTATIONIBUS  
manè discutienda in Scholis Medicorum, die Jovis vigesimo-  
secundo mensis Februarii, Anno Domini M. DCC. LIX.

M. FRANCISCO - LUDOVICO - THOMAS D'ONGLÉE,  
Doctore Medico, Præsîde.

*An ex corporis œconomiâ necessariò sequatur mors naturalis.*

### I.



ADMIRANDA corporis nostri compages! tot ad diversos motus diversa organa, ad varias operationes mechanisus accommodatus, stupendus partium inter se consensus, corporis & animæ intimum reciprocumque consortium, cœlestis auræ Afflatum arguunt, Deumque adesse demonstrant mille modis. Homo ex limo conditus sentit, percipit, ratiocinatur; varias artes, scientiaque mechanicam, agriculturam excogitat. Nec ad solam superficiem globi nostri ejus curæ terminantur; matris communis terræ viscera fodit, & ex intimo sinu varia metalla, cæteraque mineralia eruit, & ad suos usus fundit, expolit, accommodat. Quin & terras linquens cœlum scrutatur, sedulâque indagine siderum motus deprehendit, quâ cognitione anni tempestates notet, itinera sua dirigat: jamque ad ultimos Indos suæ viæ securus ibit mercator, metuetque tantum infames scopulos & mare turgidum. Sunt qui de rebus absconditis Metaphysicâ, Theologiâ, Morali eleganter disferant, ratiocinioque adjuti veritates abstrusas faciant publici juris. Ast quantum in Medicinâ excolendâ insudârint homines quis potest sufficienter dicere? quibus dignè possunt laudibus extolli in Physicâ, Chimiâ, Anatomîâ, Botanîcâ tùm inventiones, tùm inventores recentiores præsertim, ex quo tempore invaluerunt sedula indagatio morborum, methodusque medendi accommodata & experimentis tùm Physico-Chymicis, tùm Medico-practicis illustrata, medicamentorumque imperitiâ & impudentiâ jactatorum obsolevit monstruosa farrago. Nec mirum quod in suam partem tot animos Medicinâ traheret, cum nulla dignior, nulla illecebris plenior scientia quæ homini valetudinem, id est vitam longam felicem pollicetur, immortalitatis desiderio, homini naturaliter insito quantum potest suavissimè blandiens. Verum quidquid pleno ore crepent Chymici nonnulli, nulla datur Medicina universalis, inania sunt eorum promissa & certè multò magis si senium mortemque inde sequentem remoraturus, vel & impedituros esse profiteantur. Nempe vitam suâ mente concipiunt quasi flammulam aliquam, & si ita foret, omnino præstare

posset aliquid Chymia, obstans scilicet ne aura illa vitalis quâ deficiente deficeret homo (ut lampas oleo consumpto) extingueretur, eamque pro lubitu renovans & augens. Ast alio è fonte oritur moriendi necessitas. Felices adhuc æstimandi homines, si non lethi accelerarent gradum diversi morbi varique casus ineluctabiles, quibus sæpe se comites addunt omnigeni vitæ errores, labores, vigiliæ, ingluvies: his enim omnibus ante tempus machina subvertitur.

## I I.

**C**ORPUS humanum non potuit ex marmore fieri, neque una continua statua esse: cum enim ei peragendi essent infiniti motus, necesse fuit ut ex infinitis fieret machinulis; & quod plura parti cuique præscripta sunt agenda, eò exiguis & crebrioribus conflata est particulis. Fibris organicis opus fuit etiam insigni flexilitate: absque illâ concipi nullo modo possunt articularum sistole atque diastole, musculorum actio, & sexcentæ aliæ corporis operationes. Multum etiam adjuvat mechanismum totiusque mobilitatem staminum exilitas, primarumque partium organicarum figura tubulata, in fibris etiam muscularibus quantum suspicari possumus affectata. Cum autem per vasa illa tubulata corporis nostri perpetuo motu fluant humores, teste autopsiâ imprimis microscopio adjutâ, perspiratione sanctorianâ, vulnereque tenuissimo acutissimâ etiam inflicto ex quo protinus fluit sanguis vel liquor alius serofus limphaticus; necesse est aliquas particulas semper deradi & abscedere; partiumque illa destructio in moleculas comminuta tenuissimas dilutæque seroso liquido, videtur esse materia insensibilis perspirationis. Itaque homo ex naturâ suâ tendit ad abolitionem, morsque ex vitâ profecto fieret consumpto paulatim toto corpore, nisi ex alimento assumpto, in nostramque naturam opere mirabili chylificationis sanguificationisque mutato damna rescirentur: in eoque consistit corporis omnino facti integritas, ut tantum ei accedat per nutritionem, quantum per actionem vitæ decessit. Non verò ab hac abrasione exhalationeque partium pendet senium morsque naturalis, cum iacturam assumpta reparent; alio lethum properat pede: nempe, ut supra annotatum fuit, ad vitam seu aptitudinem ad varias corporis functiones absolvendas debita requiritur flexilitas, mobilitasque organorum, iustumque partes inter solidas & fluidas æquilibrium; si nimis prævaleant fluida, staminum corporis brevi succedet destructio; si solida, nulla fere erit in hæc actio fluidorum, nullaque proinde reactio; hinc quiescent omnia brevi & vita suffocabitur.

## I I I.

**F**LUIDA in corpore nostro quantitate plurimum evincere solida millenis comprobatur experimentis, & incredibile serè quàm parum sit verè solidarum partium. Hemorrhagiis, phtisi, marasmo homo quidem potest ita mutari ut suæ molis vix ullam partem retineat, cum tamen nihil nec vasorum nec musculorum omnino pereat, solaque de vasis elabantur dissipenturque fluida. Idem ars præstare potest venæ sectionibus, & solutionibus alvi repetitis. Omnibus verò aliunde æqualibus, multo minor est in pueris ac in senibus solidorum quantitas vel massa, cum solida successu temporis ex fluidis efformentur, à quibus differunt ordinatione particularum & agglutinatione. Homo qui primò quidem in spumantis libidinis guttulâ latuit, intra novem menses in eam increvit partium tum solidarum tum fluidarum molem, quam cernere est cum sub auras prodit; necesse ergo fuit ut ex liquore amnii, & per funiculum umbilicalem ex sanguine matris ei accederet quicquid substantiæ requisitum fuit ad illud incrementum. Ex claustris verò uteri liberatus, aëre compressus, ejusque vi & frigore corroboratus, jam densatis constrictisque solidis non tam cita capit incrementa. Quæ præbebat mox nutrimentum natura omnino confectum infanti

3  
 terribilissimo & ferè liquefcenti, jam non adeò molli parat alimentum blandum quidem & faciliè subigendum, sed tamen actionem stomachi, intestinorum, vasorum chilopoiericorum totiusque machinæ requirens, lac nempe muliebre confectum ex chilo sanguinis aliquoties abrepto circuitu, & mammarum organis secreto. Primo anno corpus infantile notabilem magnitudinem acquirit; paucam tamen, si conferas cum eà ad quam per novem menses inclusum gremio materno evehitur; minoremque iterùm secundo anno adipiscitur: robustiora enim & rigidiora facta organa extensioni magis resistunt. Fœtus verò extensibilitatem miram faciliè explicat totius corpusculi mucositas, natura viscida, vasorum innumerabilis copia, cordis impetus & amplitudinis in ratione ad fluida humana vasaque primigenia major proportio, quæ viribus fibræ, membranæ, vasaque omnia extenduntur, elongantur: His omnibus quotidie decrefcentibus, imminuitur etiam corporis lentiusque procedit incrementum; tandem à vigesimo anno ad vigesimum quintum (quo ætatis stadio totam ferè homo adeptus est magnitudinem fibræ tunc ulteriori prolongationi resistentibus) vix paucis augetur unciiis. Et certè si singulis annis eadè proportionem increfceret ac per novem primos à conceptione menses, brevi terrarum orbem angustum experiretur humanum genus. Labente denique ætate tota machina solidescit, affrictu perpetuo sanguinis canales minimi texturam ingredientem membranarum ex quibus vasa majora efformantur, coalescunt, & conferruminantur, elisi assiduo laterum attritu ad se mutuo, membranæ spissescunt, fibræ rigidiores fiunt & humoribus imperviæ. Forsàn & ad hoc conducit molecularum solida suâ agglutinatione efficientium inconcinnus ordo à primigenio diversus; cum enim actione vitæ continuè abcedant multæ particule & nutritione resarciantur, verosimillimum est non eadè ordinatione reparari, quæ fortassè mobilitati & flexilitati omnium maximè favet.

#### I V.

**E**RGO ad mortem naturaliter tendit corpus; agilitati torpor, robori debilitas, vitæ lethum succedit. Homo quinquaginta annos natus jam non integer suis functionibus corporis statum supergressus est: paulo post oculi excavantur marcescente adiposo pulvinari eis supposito, pristinumque amittunt nitorem & aciem; deinde & reliqui sensus & animi vigor affectusque debilitantur, hebescent: mox membra titubant, humore articulari exsiccatò neque faciliè renovato ægrè peraguntur artuum motus, exsiccatis cartilaginibus intervertebralibus tota statura faciliè brevior fit, perit elegans corporis facies, arescunt muscoli & ad motus inepti fiunt; quem denique juvenili ætate fruentem totum florentem, vigentem, valentem cernebas, nunc exsuccus, exsanguis, impotens, vix sui similis mortem increpat morantem, quæ tandem accidet, cum induratis arteriis, ita ut cordi perfectè resistent, sanguis immotus sistitur, minusque morietur corpus quàm vivere desinet, succedente adeò exoptatâ veteribus illâ *evluvaria* senili. Siccinè ad mortem factus homo? Siccinè ad has miseras reservatus ut vita in eo faceret interitum, ut optimis artibus & scientiis instituta mens ad puerilem debilitatem redeat? Lugenda certè hominis conditio, ni pars sui melior vitarent libithinam animaque fama-que superstes, & felix forent virtutis præmium spes vitæ melioris, rectèque facti conscientia! Nec deest sapienti tamen merces præsentior & temporanea; homines enim infani vigiliis, lucubrationibus nocturnis, opiparo victu, baccho liberaliori & omnimodâ cupiditatum indulgentiâ corpus brevi destruunt, morisque accelerant gradum, glutinosam adtractilem vim liquidorum annihilantes, sanguinique friabilitatem, acredinem, fibræ verò siccitatem, duritiam inducentes. Qui verò vitæ stadium prudenti percurrit gradu, & violentiora animi pathemata, exercitia validiora, venerem nimis cultam, lauta con-

4

vivia fugit angue pejora, huic vita felix & tranquilla tardumque succedet senium tristioribus incommodis: sanitatis enim sapientia soror, hæc sola moram affert rugis & immici letho.

V.

**N**EC repugnat nostra sententia Sacræ Scripturæ quâ declaratur homo ad mortem tantum ex delicto suo damnatus; nihil enim numini impossibile, quique Deus hominem creavit, eum sanè potuit à morte immunem facere. Absque absurditate etiam concipi potest impressam esse homini moriendi sortem, nec ullà opus fuisse ad effectum fortis expressâ aliquâ Dei voluntate; delictum ulciscitur natura sui juris facta, quæ supremi numinis legibus coercita homini obediendi præmio fuisset. Aliundè potuit homo eâ conditione donari, ut in eo damna vitæ refarcirent alimenta, eâ tunc fortè virtute prædita ut corpus omnino repararent, & integrum eundemque continuò præstarent, gluten illud viscidum, ductile, flexile quod verè diceret humidum radicale eâ proportionè refarciendo, quâ per vim vitæ absumitur. Ast in homine ut nunc est constituto, peccatique lapsu prostrato perierunt ea privilegia, nihilque novimus quod à morte & senio corpus immune faciat, nempe nulla alimenta, nulla medicamenta quæ organorum rigiditatem præcaveant. Idè enim senescimus & morimur, quia arescimus. Hæc veritas quæ innouit *Sanctorio* & *Ruischio* (licet minoreni quàm par erat ei tribuerit hic ultimus extensionem, de glandulis enim mesenterii tantum dixit quod verè diceret de toto corpore) consentaneam habet rationem & experientiam, ut demonstrant animalium ætate confectorum arteriæ cartilaginæ & minimè flexiles, ossa de corde bovum & ceruorum annosorum, &c. Hinc intelligitur quare citius senescant homines rustici & validioribus laboribus agitati; cur lentius, qui vitam tranquillam degunt: indè etiam quæ diæta aptior sit ad ad senium removendum, vel mortem in senio remorandam, tenuis nempe ex sero lactis, vino edentulo, & aquis vegetabilibus, leviterque fermentatis alimentis, balneis denique emollientibus quibus etiam Medea juventam, reducere dicta est; quæ omnia lethum retardare quidem paulisper, non verò præcavere possunt; adeò vera est illa conclusio.

*Ergò ex corporis æconomiâ necessariò sequitur mors naturalis.*

DOMINI DOCTORES DISPUTATURI.

*M. Henricus-Michael Miffa, Militarium Nosocomiorum ad Regis exercitum Medicus.*

*M. Joannes-Baptista Hatté.*

*M. Joannes-Nicolaus Millin de la Courvaux.*

*M. Henricus-Jacobus Macquart.*

*M. Theophilus de Borden, Eques, Nosocomii Regii & Militaris Boregensiis Medicus designatus.*

*M. Petrus-Abrabamus-Pajon de Moncets, Eques.*

*M. Andreas Cantwel, Chirurgia Gallico Idiomate Professor designatus, & Regiæ Societatis Londinensis Socius.*

*M. Benjamin-Ludovicus-Lucas de Laurembert.*

*M. Leander Peaget, Consiliarius Medicus Regii ordinarius in ejus Castellæ.*

Proponebat Parisiis JOANNES-ARMANDUS ROUSSIN DE MONTABOURG, Parisiensis, Saluberrimæ Facultatis Medicinæ Parisiensis Baccalaureus, Theses Author, A. R. S. H. 1759.

A SEXTA AD MERIDIEM.

Typis Viduæ QUILLAU, Universitatis & Facultatis Med. Typographi, 1759.